

晚

晴

移

詩

匯

晚晴移詩匯卷五十六目錄

查慎行

五十七首

查克建

二首

王式丹

五首

錢名世

四首

蔣廷錫

九首

徐潮

一首

趙殿最

一首

涂天相

三首

陳邦彥

一首

吳廷楨

七首

宋至

六首

萬經

一首

閔衍

一首

曹維城

一首

胡期恆

三首

劉青震

一首

王企堂

一首

王霖

五首

仝軌

十八首

翟一枝

一首

南天章

一首

浦銑

一首

晚晴簃詩匯卷五十六

徐世昌

查慎行初名嗣璉字夏重又字悔餘號初白海甯人康熙中以舉人召直南書房癸未賜進士改庶吉士授編修有敬業堂集

王漁洋曰夏重詩黃晦木先生常比之劍南余謂以近體論劍南亦未之過當與古人爭勝毫釐若五七言古思劍南亦未之過當與古人爭勝毫釐若五七言古體夏重麗藻絡繹釋宮商抗墜往往有陳後山元遺山之風重麗藻絡繹釋宮商抗墜往往有陳後山元遺山之及兼多駁正所為詩得力於蘇意無勿申辭無勿達或以少蘊藉議之然視外強中乾襲面目而失神理者固孰得而孰失耶詩話國初諸老漸厭明七子末流科曰至初白乃專取徑於香山東坡放翁祧唐祖宋大暢厥詞為詩派一大轉關其自言在熟處求生題宋大暢厥詞為詩派主伯拾楊劉唾甘讓西崑號作家大旨昭揭歸愚有微詞則門戶之見也初白以詩受知仁皇未通籍卽入直南齋嘗因賜鮮魚紀恩詩有云笠檐蓑袂平

生夢臣本煙波一釣徒最邀宸賞宣召時呼煙波釣
徒查翰林世以此唐韓翃之春城無處不飛花傳爲
玉堂嘉話蒙賜御書敬
業堂額因以名其集云

水西行

烏蠻遺種稱羅鬼剽悍斷頭能掉尾傳從濟火年代深世
土居然屬宣慰我從里俗詢大概復取興衰質諸史中古
荒茫不足論淵源請自先朝始洪武初年禍亂平遠略僉
荒來越嶠是時奢香一巾幘躍馬金陵謁天子承恩歸去
立奇功一諾西南九驛通卻笑五丁開不到亂山高下隔
蠶叢二百餘年太平業世世分藩比臣妾後來生聚啟規
模四十八支互蟠結別開荆莽起臺殿硿戶礪房高櫛櫛
已分王土作王臣旋練夷兵護夷穴剝牛磔犬片言重聚
蟻屯蜂一呼集布囊籠髮氍覆肩負弩操刀輕出沒泰和

功烈汾陽亞神廟中年平播賊當時亦用水西兵驅使前行借餘力釀成殃禍啟禎朝殺吏圍城氣漸驕深宮南顧鞭難及諸將西征功屢邀土司如狼吏如鼠八捷餘威棄歸路內莊一夜隕河魁明日三軍齊縞素眼中大創眞無幾可惜偷安旋就撫閣鴉關外曉傳烽靄翠營南夜鳴鼓邇來桑海變須臾此輩根株未盡除夷性陸梁還似故朝家謀略故非疎經營特借强藩力辛苦開疆一載餘至今父老猶能說墨守輪攻眞勁敵老窠地險石作城要隘不容雙騎入銅牙毒矢斃濡縷竹柄長矛利鉤棘馬蹏過嶺捷于猱革甲環身輕似葉連宵斫陣萬炬明散入深林曉無迹蛇神蠱鬼助饕虐飛食人頭吐人血砦前路斷臨奔壑失勢一摧千萬尺四山伐木斲作廂裏用牛皮冒生鐵

石椒懸綬下槌門雷斧轟天巨靈劈攀藤健兒氣力盡拍
手蠻娘笑投石重圍坐困又經時轉粟方愁乏良策豈知
存滅總關天渠首終成戲下懸萬嶺提封開四郡一朝腥
穢滌千年自此巖疆少蜂蠆餘威遠懾諸苗砦空留徼外
廓清功自蹈人間僭亡罪此日重勞問罪師烏飛三匝失
棲枝忽傳耐德生還日趙氏中山尙有兒烏蒙犄角稱甥
舅曾是安坤舊婚媾也挈遺孤代乞哀復歸故土希恩宥
頗聞軍令競邀驩滿許閒田復見還土貢紛紛呈鐵蹄庚
苴往往賜銀盤寄語封疆諸大吏從前開闢談何易莫貪
扯手納金錢此事孤雛有深意輸糧禽賊爾何功王會圖
成戎索同不見天心今厭亂戰場新鬼盡英雄

班師行

滇池平滇水清滇南曠蕩餘空城犬無夜吠雞不鳴將軍
奉詔初拔營幾姓分旗徧行賞同時帳下添廝養何取邊
頭戶口繁十年生聚滋奸黨白頭翁媪嘯且僵棄擲不得
收戎行翻身一仆委溝壑骨肉滿眼紛飄揚紅顏如花扶
上馬坡高驚墮珊瑚把兒郎新嫁羽林軍山下人逢執鞭
者近前一隊飛塵起中有傷心淚偷灑朝家本意重開邊
劇賊初平近十年爾等纍纍皆鬼妾偷生敢復祈哀憐卽
如滇城圍七月未能下戍卒壘頻高書生箸誰借君不見
禁旅一出西南通煌煌中旨褒膚公參軍誇謀士誇勇逢
時多少稱英雄綠旗只合就裁汰那許尺寸貪天功從此
歸成垂白叟賣刀買犢安農畝猶及生兒際太平家家相
賀持羊酒

母豬洞觀瀑

蠻中六月交山路苦焚蒸臥聞夜雨來快起尋乳穴入洞
微有聲足底響鳴咽出山忽震怒閃睽不容掣巖前匯奔
流人駭馬辟易來如曳組練一綫注飛白跌爲淵潭深湛
湛落澄碧石牙互參錯吞吐霹靂舌直從灣環底跳沫騰
百尺慘慘天變容凜凜風作雪岡頭杜宇叫萬竹劃然裂
將歸得奇觀頓解肺肝渴

同人中秋集陳寄齋宅

南游我昨逢佳節兩度中秋瘴如墨去年對酒洞庭湖萬
頃平波鋪練雪電光一瞬等閒過倏忽還家又今夕良朋
折柬邀共醉憐我恩恩復行色晚來微雨過城西影落人
衣月東出明河一洗秋容淨海氣天光較然劃街頭無人

市聲斂相國門前月尤白門前看月堂上歌白月紅鐙互
相射繡屏屈膝圍嬌面赴節紅牙夜深拍沈沈簫管索索
絲微動梁塵墮猶澁清商一綫徐引去桂樹流颺葉初脫
此時中庭月停午窈窕穿簾巧相覓須臾腰鼓忽句闌假
面西涼羣嘖嘖歡場冷落年數久對此翻令感蕭瑟卻憶
江湖載酒時蘆花深岸聞吹笛故人顏色就歸夢羽短途
長莽飛越此來會合殆天幸竿木逢場看跳擲徵歌自笑
膽氣粗起舞偏驚耳輪熱東南盤敦君眼見供帳如雲掃
無迹獨留好景付我曹莫向瑤臺話塵陌只愁客散月易
斜人事蒼茫難料得來年作客知何地此地來年召何客
南枝棲鵲催五更東野寒蛩號四壁殷勤酌月還一杯珍
重清光照離別

宿梨洲夫子武林寓舍卽次先生丙辰九日同游舊

韻

徑路先須辨陌阡眼中榛莽正鉤連肯攜芸蠹隨書局任
放醯雞覆甕天出處心情三聘後滄桑人物兩朝前先生
高卧貧何礙流俗知音恐未然

送魏環極先生予告還蔚州

曳履星辰二十年尙書襖被故蕭然勇能自斷天難奪清
畏人知世已傳白社竟成娛老地黃金不貯買山錢閒雲
一片秋寥廓何限風光倚杖前

嶽嶽寒松表御書

寒松堂公臨行時御書賜額也

新堂歸到好懸車身名

似此眞無愧進退何人綽有餘報國文章傳後起

謂無僞中翰

立朝風骨想當初不因祖帳東門道太息方煩比二疏

金章宗手植松在壽安山西嶺上

壽安山頭一老松從下仰視青童童羽衣仙人擁蓋立柄

短卻作偃僂容我思躡屨苦無伴范老

性華

興到許我從

婆娑初自枝亞入中乃可置一畝宮四傍四枝分四面側
理橫出交蓬鬆東西南北不相願意到各自成蚪龍中間
大枝裘挈領高勢一攬收羣雄其旁峭壁截牙角直下千
尺方藏鋒蒼髯翠尾掉空際蜿蜒飲澗天投虹千山萬山
似搖動鱗甲未斂雲濛濛須臾夕陽轉西麓脇下罍罍生
微風一聲老鶴忽飛出竿籟散入鄰菴鐘老僧指似時代
古手植傳自金章宗是時朔南罷兵革貢使一一舟車通
明昌泰和號極治擊毬詐馬習俗同近郊亭館恣游宴逐
獸不入深榛叢遺山野史有深意國亡事去忍更攻孤臣

飲泣記舊恨肯畏後世譏不公洗妝樓空春月白射柳圍
廢秋花紅一朝故物獨留此鬱鬱幸自蟠蒼穹邇來四百
四十載坐閱桑海如飄蓬輪囷差堪伍社櫟瀟灑猶足驕
秦封君不見報國門前數株樹託根悔落塵埃中

酬別鄭寒村

闌風伏雨兼旬卧晴路一鉤新月破簾前暑退得新涼門
外泥深成埒坳此時有客過言別蹙蹙毛驢壓歸馱囊空
鄰酒賒不來醒眼相看但愁坐一篇削棄辱佳序七字留
詩慚屬和余才舛陋非爾敵強以珠璣承咳唾甬東同學
屈指論往往傳經接師座故人再與瀛洲選一鄭滎陽尙
摧挫失羣行李獨淹泊有價文章久傳播燕山此度六往
來未免征衫被塵泥干時少術非爾病當路無援是誰過

向來人盡棄所長遠到君能見其大古人可作迺殊代同
調相求凡幾箇勿將時命較窮通只許才名出寒餓羨君
有志成果決笑我無端逐游惰偶逢知己私自歎每送歸
人輒相賀荆榛滿地羊觸藩日月周天蟻旋磨故鄉樂事
殊可憶欲往從之正無那秋風一騎不可留八月江田熟
香粳

喬石林侍讀一峯草堂看花同外舅陸先生朱十表
兄錢越江周青士孫愷似湯西崖分韻

愛花成癖不待招春來徧踏東西郊起聞曉鳩送春去猶
跨短鞵搖吟鞘斜街草堂地清絕瘦藤當戶拏老蛟土牆
面面紅窰堵沙徑曲曲青盤坳礬頭暗皺高下石亭子乍
翦離披茅巧從陰借桃李杏惜少水養菰蘆茭棠梨素妝

太淺澹繁蕊亂拆丁香苞新開海棠好顏色兩樹氣壓千
花梢主人爲言初買得舊根帶土枯蒲包擔頭親爲解其
縛位置特許依書巢栽培本關造物意人事未盡休輕嘲
顰泉口嘗手自灌及見紅豔青葱交他人買園身不到君
乃僦屋情難拋花時連日得休沐剝啄有客門頻敲行攜
几榻隨分設野蔌蒸薺樽窪匏偶然興到觸佳句已被萬
手爭傳鈔我詩不工強屬和出語毋乃同號喚不成甘受
金谷罰忍負新月垂弓梢

送趙秋谷宮坊罷官歸益都

時秋谷與余同被吏議

竿木逢場一笑成酒徒作計太憨生荆高市上重相見搖
手休呼舊姓名

劉魯封章指摘生滄浪大可濯塵纓肯言預會皆名士誰

似君家老叔平

君別蓬山作謫星我從霧谷擬潛形風波人海知多少聚散何關兩葉萍

南北分飛悵各天輪他先我著歸鞭欲逃世網無多語莫遣詩名萬口傳

秋谷贈余詩有與君南北馬牛風一笑同逃世網中之句

初冬拜朱大司空墓感賦

城南舊是陪游地一片蒼涼野哭中宿草墓門黃葉雨亂鴉祠宇白楊風餘生削迹誰知己往事傷心我負公肯信九原還有路人間何處不途窮

漢瞻自洞庭先歸詩以志別卽次見贈原韻

兼旬索句添窮忙草根唧唧蟲鳴霜尙慚皮陸作唱和敢與李杜爭光芒君詩盡納三萬派山骨巉巉波洋洋登壇

欲來執牛耳取徑故險迴羊腸林深霧黯蓄幽氣虹見雨
霽開晴光吟從舌端作倔強寫向紙面生低昂稍嫌工遲
似司馬容我笑傲林泉旁憶初弭棹同卧起明朝聯臂登
高岡穿松踏石困俛仰攀躋中道多徊徨奇峯忽拔二千
尺快劍磨出蓮花鋸聳身側足狂叫絕生平奇境得未嘗
三湘七澤舊雖到卻溯洲渚舉孤芳黃金荒臺感燕士畫
棟高閣悲滕王十年浪走癡已極游蹤脫略失故鄉星埃
大笑一回首攝衣纔謁三高堂所嗟筋力就疲憊漸遣興
趣成顏唐眼前又當搖落候蒹葭露白秋蒼蒼不知此中
有何樂對爾意氣還飛揚男兒生涯志未豁善刀合學庖
丁藏百觚醉汲鄰叟甕一枕倦寄高僧房得道在先成佛
後茲理反覆天應償逢人但拜孟東野去我獨惜張文昌

扶筇縹緲有夙約

與漢瞻約游西山未果

肯計盎底無餘糧風波衝

冒總爲此子今束書我亦將行當長謠答黃竹不爾妙曲

賡紅桑鬱鬱誰能耐離索空樓夜雨思連牀年來萬事經

眼見窮達竟分姜與湯

不分窮約姜與湯漢瞻舊句也謂西溟西涯

舊游如夢

那可說祇有末路堪評量名山業豈異人事慎勿屑屑耽

詞章

石鐘山

鄱陽吞天來噴薄南出口江流不能敵抵北乃東走懸崖
峙西灣水勢掃如帚孤城艮其背外捍賴兩肘靈區聚神
奸石狀雜妍醜平鋪理橫截旁罅中劈剖熊羆飢攫人奇
鬼起援手蜂窠掛篙眼鳥卵破礪缶一一皆下垂中空無
一有有時應鞺鞳照影見星斗忽然風喧厖聲作蒲牢吼

年深追蠡壞兼恐石斷紐惜哉坡公記石刻泐已久蘇公山記舊刻於南鐘石上明正統己巳石裂仆於水今失其處矣茫茫宇宙間孰是真不朽

五老峯觀海綿歌

峭帆昔上鄱陽船我與五老曾周旋兩塵相隔骨不仙蹉跎負約十四年近來稍知厭世纏筋力大不如從前扶行須杖坐要簍絕境敢與人爭先山神手握造化權走入南極分炎躔鞭羊欲從後者鞭假以半日登高緣風清氣爽秋景妍芙蓉千丈開娟娟長江帶沙黃可憐湖光爭洗顏色鮮背負碧落蓋地圓尺吳寸楚飛鳥邊初看白縷生棲賢樹杪薄冒兜羅縣移時騰湧覆八埏四傍六幕一氣連滔滔滾滾浩浩然渾沌何處分坤乾近身扁石履一拳性命危寄不測淵陽烏砥撲光倏穿飢蛟倒吸無留涎以山

還山川自川五老依舊排蒼巔來如幅巾裹華顛去如解
衣袒兩肩酒星明明飛上天人間那得留青蓮此時此景
幻莫傳頃刻變滅隨雲煙

王文成紀功碑

明朝制科號得士吾鄉前輩尤絕倫于公王公後先出往
往艱大投其身朝廷坐收養士報倉卒定變皆儒臣正德
己卯夏六月逆濠犯順江湖濱公然舉兵思向關三郡一
閩生祗塵皖口駸駸勢將下留都岌岌恐震鄰是時海宇
正清晏武備缺略久不振公方持節撫南贛似可觀變徐
遽述同仇大義憤所切守土敢限越與秦出師必待九重
詔是謂以賊遺君親飛書插羽聲罪討攻所不備眞如神
自從擣巢及執醜通計時日纔兼旬軍門戎首已面縛天

子韎韜方南巡石頭城南獻馘罷待命行及明年春周公東征尙跋扈形迹詎可拘忠純盈庭宵小古亦有忌者愈眾節愈伸初心祇期濟國事豈必畫像圖麒麟茲山勒銘蓋有故深刻歲月題庚辰紀功非夸乃紀實書法邁勁辭溫醇首從伐叛敘始末繼舉神武歸丹宸天方嘉靖我邦國誰其紀者臣守仁隨征官屬例得列惜哉名姓今俱湮讀書臺傍一片石百四十字磨崖新逸事吾聞長老說宏治乙榜凡三人後來立朝適共事數本前定非無因胡發其奸孫殉難公乃一手回千鈞宏治五年吾浙鄉榜公與年場中見三巨人傳爲異事及宸濠之變胡首煌煌勲業發其奸孫以巡撫死難三人共此事亦一奇也本德性出遇世會開經綸質諸百世可無惑似此理學甯非眞後來輕薄好詆毀撼樹不過欺愚民如公表見猶未

免此外何以加冠巾手磨碑碣發長嘯白日皎皎懸秋旻

拂水山莊

松圓爲友河東婦集裏多編唱和詩生不並時憐我晚死
無他恨惜公遲崢嶸怪石苔封洞曲折虛廊水瀉池惆悵
柳圍今合抱攀條人去幾何時

鷹坊歌

風林蕭蕭夏脫木坊以鷹名似牛屋其中最大名海青戴
角森然異凡畜我初識名自遼史特產曾傳女真獨楷矢
同來肅慎庭初時底貢猶臣服屢求難厭禍旋結兩國興
亡手翻覆天教此物雄海東自長窠雛成一族

康熙天子神聖姿駕馭英雄兵不黷每因續武勤校獵遠
致奇毛比臣僕紫荊關外秋氣高狐兔甯容草間伏腥風

霍霍滿天地白日無光散原陸揚旌表貉出從禽王用三
驅力爭戮是時海青更精悍臂出綠鞬調養熟翻身一去
高沒雲注目秋空走馬逐蹏間十丈莽開闊驀過林巒躍
坑谷忽看天半挾天驚奔電流星下投速羽林健兒拍手
笑奏凱不煩遺矢鏃卻來斂翮復依人仍以黃絲掣雙足
三時飼養一朝用如許恩波等休沐奉先性在飢附人定
遠功成飛食肉不知給俸視幾品肥瘦論斤常量腹生牛
乍割血猶紅小鳥一吹毛盡禿見人作勢俄聳肩獨立有
時還側目無端對此我心惻相向移時額顰蹙獅兒噉虎
魚食蝦吞噬成風傷末俗生意漸微真可歎殺機欲動休
輕觸以仁易暴古所云恃猛爭強非汝福我願皇天仁百
物常產鳳凰生鸞鸞自然郊薮萃禎祥盛世多珍四靈畜

沈客子舊寓都門所居曰獨樹移自撰七言古詩曹
實庵錢玉友湯西厓皆有和章今來索余補作仍

次原韻

沈子清才在塵埃有如菡萏生淤泥又如服鹽駕鼓馬下
有逐電追風蹏青衿蚤爲命所制百寶未了酸寒蘼三年
四門作都講啄粒亦到官倉稊人中嵇紹本易識孤鶴氣
壓千羣雞家家朱門當大道爾獨隘巷尋卑棲歸來欠伸
看礙戶一笑入戶頭仍低空庭得樹翻自喜有淦仰視雲
萋萋忽驚霜禿九秋幹旋見雨長三春萸墮巢晨拾赤腳
婢落葉夜掃長鬚奚問君此間亦何樂乃挈穉子攜山妻
狂來對客發高論塵柄手捉談天犀北郭槁枝聊隱寓東
方簣藪真滑稽孤松祗宜伴彭澤五楸大可娛昌黎翻身

買權竟南下野性終近深山麝故園喬木正合抱叮嚀旁
接澆花畦昨非今是恍夢覺涉腳尙淺幸未迷伐檀河干
等無用美哉河水清漣兮

邯鄲呂翁祠

幻妄浮生豈有涯何妨鼠穴駕牛車貧兒好作游仙夢怪
事偏傳小說家古道蹇驢多北向空庭秋日又西斜人間
官賤黃金貴乞與燒成九轉砂

過鳳陽城外

帳下居然識帝王千秋閭墓表滁陽時來將相皆同里淚
落英雄有故鄉芒碭天青雲氣散江淮月白水聲涼龍蛇
變滅須臾事猶指山名號鳳凰

元老還朝起廢臣二陵收氣避黃巾忽聞淮泗聲援地已

奉邯鄲假號人南渡半年輪弱晉西來羣盜甚苻秦青絲
白馬他年恨草木餘威在壽春

甘泉漢瓦歌爲侯官林同人賦

林生老立專門學金石遺文卷盈握曾經從宦走長安斷
碣殘碑蘇親剝昭陵蹟廢補亡闕磨石山高穿硤礪冰霜
裂面虎豹嗥沙礫堆中拾完璞摩挲銅狄自何年萬棟灰
飛片瓦全爲按黃圖考宮殿始知地是漢甘泉底平面正
規而圓肖形似鏡還如錢其高半寸徑三寸旁具輪郭中
不穿土花蝕後文留識上有長生未央字龍拏鳳攬結撰
奇肉厚肌疏形體異與人作硯不中用抱質如初無變置
吁嗟乎楊仲南劉敞不作識者希時俗誰能辨真僞巧多滋
僞樸者眞此瓦人間蓋無二豈同冰井香姜閣埏埴紛紛

託疑似勸生勿更加礪磨本色須教存古意生領此語索
我詩我詩質直無娉辭請煩拓致數十本徧乞羊何共和
之或恐流傳落人口陶甄又復成今手

仙游茅筆歌

羣山海上來絡繹趨九仙仙翁此山住示夢於幾先

九仙祠祈

夢最靈

山中老樵枕石眠斧柯斷爛不記年夢中髣髴遇神

授筆花畫吐黃茅天覺來信手縛不律巧被筆工偷妙術
遂令九仙祠下三脊茅用與雞毛鼠鬚匹中書免冠頭不
禿菅蒯居然效微質幸渠一束價未高殿頭簪珥非汝曹
若教朱墨官盡取便恐仙山成不毛君不見連山伐竹兔
拔毫鐵梳膠綴何其勞穢吏自執奸吏操直與此輩供錐
刀老夫鈔書指生繭怕搦人間管城管塗鴉結蚓隨爾爲

不要殘年護吾短

西湖糧歌詞

湖面平添積雨餘放生池外葑初除誰司水族加恩簿開
過桃花未打魚

鑿開混沌著丹青落石猶疑處土星白鶴不歸梅樹老鷺
鷗飛上御書亭

萬葉千花綴彩棚火蓮龜背吐層層不知白日長多少又
點湖心照夜鐙

蜂喧蝶鬧奈春何拂面風香過綺羅此意少年應未會第
三橋畔落花多

連日恩賜鮮魚恭紀

銀鬣金鱗照坐隅烹鮮連日賜行廚感踰學士蓬池鱠味

歷詩人丙穴腴素食餘慚留匕箸加餐遠信慰江湖笠櫂
蓑袂平生夢臣本煙波一釣徒

恩賜哆囉雨衣恭紀

短褐頻趨道路塵青氈猶是向來貧爲憐襤襪隨朝士特
賜哆囉出闕賓燥溼推恩慚厚庇短長稱意荷終身從今
聽雨聽風候瀑直堪誇楮柱人

秀野草堂圖歌次顧十一俠君原韻

王麓臺仿董文敏盧鴻草堂筆

意朱竹垞有記

某樹某水與某邱曠懷往往消百憂無端弓旌被纏鎖坐
對塵壻生牢愁盧鴻草堂圖閱世已千載十志並流傳其
人儼如在問誰好事供蕭灑毋乃眞迹留王宰華亭最晚
出樵本發精采今之妙手繼者誰摩詰前身應畫師丹青

一變粉墨骨寫向尺幅尤雄奇云是吳中小秀野何斯佳
境移於斯堂中主人顧十一結客論文兩豪逸百家汎濫
流溯源萬口喧傳名副實我是當年入座人淋漓衫袖梨
花春愛其披豁氣誼眞丰格彷彿餘先民宴衍之樂非絲
竹水色煙光八窗綠半酣颺沓風雨來歎玉跳珠三百斛
鐵崖老矣阿瑛貧空巷閒拋薜蘿屋可憐相見鳳城西儼
舍還同燕子棲猶能折柬致朋舊局促肯放詩名低我詩
胡足道依樣葫蘆畫中稟惟君癖嗜之擘紙含毫共研討
留題慣惱麓臺翁作記深慚竹垞老吁嗟乎神仙富貴孰
有無默存豈必皆清都夢中五岳巾箱圖君歸來兮挾我
俱以神爲馬遽爲廬一息十反良可娛賃春齷齪難久居
乃獨憐君屋上烏

自題淳熙修內司官帖後

淳化祖帖絕難得南渡摹勒傳淳熙其詳載在輟耕錄官
本舊推修內司臨江太媚絳潭瘦字體特取豐而肥曾經
翻刻凡幾手亥豕帝虎辨者誰形模粗具木偶爾神理了
不關鬚眉近來此本亦不易世代漸遠宋拓稀大觀之後
此其亞僅與閣帖爭毫釐有如虞夏祖顓頊要是嫡派非
橫枝昨從廟肆見且駭尤物乃落駟僧兒裝褫仍用毬路
錦十卷首尾完無虧叩之高索錢五萬而我囊乏三錢雖
少需使恐被豪奪一計猛出居巢奇烏驢克貨價相直快
挾墨寶徒行歸入門爨婦告米罄一笑那顧朝來飢明窗
小几風日亮塵垢不敢侵吾帷古香透紙辟蟬蠱元氣入
骨騰蛟螭熊熊異光黑點漆滑滑膩理膚凝脂試臨只愁

鬼掣腕旁睨幸免食朵頤嗟嗟世俗慣傳誤目所未覩公
謾欺曹家譜系格古論歲月舛繆餘可知偶憑一端爲駁
證食古以耳皆如斯

瀆山酒海歌

內西華門外西南一里許明朝御用監在焉又南數十步爲眞武殿庭前老榆

一株下有元時玉酒海承以石牀玉色青碧間以黑章白暈旁刻魚龍海馬出沒波濤之狀口面約廣三尺餘隨其質爲凹凸若荷葉然形製樸古膚理溫潤中容四五石許于辰正月十九日借雲間高不騫槎客往觀摩挲久之接元史世祖紀至元二年十二月瀆山大玉海成勅置廣寒殿輟耕錄云廣寒殿在萬歲山頂中有小玉殿內設御榻左右列侍臣坐牀前架黑玉酒壺一車駕歲巡上都先宴於此燕都游覽志云今御用監中有小亭亭內一玉缸體質頗潤中積水外以朱欄護之卽廣寒殿中物也槎客屬予紀其實因參考舊聞而系以詩

雲間高生精賞鑒嗜古搜奇確且贍朝來導我出西華指
點前朝御用監監南新砌元都壇當門老檜青蛟蟠舊間

酒海今落此共歎體質猶堅完瀆山巨璞初無價誰遣不
脛來輦下至元巧匠雕琢成萬歲山頭設高架天然位置
平不頗瑣窗八面開重阿石龍吸水上霄漢倒瀉溢爲太
液波波光翻動廣寒殿滿囊蒲桃映華瑱侍臣多著質孫
衣質孫燕服見元史世祖紀天子親臨詐馬宴電轉星流四百年故都
何物不推遷曾承沆瀣依天上流落人間亦可憐亭虛無
復朱欄護頽砌旁連髹器庫天吳跋浪鬢鬣張只與空庭
飽風露君不見周彝商斝近來無形製爭傳博古圖爲池
爲海將安用笑爾幾同五石壺

殘冬展假病榻消寒聊當呻吟語無倫次錄存十六
章

卧看星回晷景移流光冉冉與衰期人言宦海藏身易自

笑生涯見事遲夜似小年寒漸信病非一日老方知惟餘
蕁菜思歸興蚤在秋風未起時

憶昨公車待詔來微名忽忝廁鄒枚主恩不以優俳畜士
氣原於教養培身作紅雲長傍日心如白雪漸成灰依稀
一覺游仙夢初自蓬山絕頂回

茫茫大地託根孤只道煙霄是坦途短袖曾陪如意舞長
眉難畫入時圖移鐙見蠅甯防毒誤筆成蠅肯被汗竊喜
退飛猶有路的應決計莫躊躇

雨露榮枯共一天塵沙聚散幾同年車摧卻怪蓬猶轉玉
碎何圖瓦幸全蠃穴冰封殘雪後雁程風緊夕陽前故人
珍重留行意回首觚稜自惘然

盡遣兒孫歸故里尙留弟姪伴他鄉囊空預借三年俸祿

入粗供四口糧舊積詩逋呵凍了近添酒債典衣償蕭然
此外無餘欠領取南窗枕味長

一榻中安四面虛放朝暉似放參餘篋中棄扇蟲緣網案
上停鐙鼠避書過隙光陰隨夢去就衰筋骨向陽舒重簾
可有纖埃到敝帚殘箕罷掃除

膈膊聲中好送寒偶然爲客設碁盤後來或者居人上先
處無如占地寬黑白當前饒勝算高低隨分有爭端老夫
兀兀支頤坐看似分明下手難

科詔加恩典不常征輶就道輩相望抱經佚老頭多白拾
芥羣兒口半黃慘澹風雲憐入彀冬烘頭腦怕當場退身
引疾猶多愧我昔曾荒陸氏莊

海內連年喪老成南傷秀水北新城讀書自要師前輩知

己誰能託後生此段人情看爛熟向來士習例相輕笑他
江左衣冠族誓墓區區爲角聲

地降天升氣不交羽禽何物尙膠膠霜濃四野鴉爭粒葉
秃千林鵲露巢各有經營甯得已未知辛苦定誰教息黥
補劓勞生事蓋頂終須一把茅

經旬坐穩一蒲團纔閱朝寒又晚寒蘊火梅欣先臘放避
霜菊耐涉冬看散花菴裏新居士視草臺中舊史官勿著
兩般分別相大千世界本來寬

不畏羣嗤不受憐孤行一意久彌堅敢誇願大難成佛肯
舐丹餘蚤得仙方朔文章多詭俗放翁家世少高年色經
指訣全拋卻人壽終非草木延

宜忌拘牽十二三靈苗毒草比粗諳性存薑桂何妨辣味

到苓連不取甘好友勸嘗眞苦口庸醫隔膜漫多談古方
難適今時用此理如禪在細參

卻病奇方乃避囂遠坊兩板閉蕭條室無歌妓何煩遣鄰
有鄉僧不待招

謂借山

石鼎濤生茶正熟銅爐灰陷火潛消

雞鳴漏盡人誰覺又聽門前過早朝

叢書三館校讐忙訝許閒情付墨莊樗本不材良匠棄屠
非絕技善刀藏冬菹剩飽園官菜歲賜刪除博士羊轉益
從前素餐愧大庖珍膳日分嘗

童時了了記觀河六十三年忽已過眼暗耳聾知老否葛
涼裘暝奈身何一帆去國談何易萬卷無家累亦多愛惜
精神圖省事明年兼擬謝詩魔

三月二日偶游硤石精舍

三月風光連上巳人如蛺蝶鬪裙衫兩山鐘磬東西寺十里煙波遠近帆拄杖我來尋履迹題詩僧乞署頭銜篋中亦有新排集儻許經房貯一面

舶趙風歌

吾聞千里以外風不同人間乃有萬里之長風來從海上梅雨後紀自西郊野叟眉山翁古稱博物家無若周元公爾雅釋天篇八方風色以類從北涼西泰凱南谷自東顏焱飄庀暴昌噎一一命義無相蒙周禮保章十有二妖祥乖別占荒豐下而莊生齊物論以至應劭風俗通飈瀏飈飈飈飈飈叫蒙吒吸咬于喁名雖巧排比語實工形容舶趙之名特未悉土俗傳說惟吳中吳中五六月水盛溽暑方蘊隆此風東南來一掃雲翳還虛空商羊黑蜥潛厥蹤

炎官亦退三舍避大啟橐籥伊誰功三日溼氣消五日暑
氣融連綿七日九日尙未止快哉何暇分雖雄羊角初從
何處起合而爲一浩蕩來無窮國家象胥譯九重白雉入
貢兼青熊良商豪賈狎海童高帆幅亞樽桑紅中男長女
各效職飛渡溟渤如輕鴻此時田間一老翁置身恍在蘭
臺宮不知人生更復有何樂但向北窗高枕卧聽聲蓬蓬
清遠峽飛來寺

兩崖勢欲合中被江流穿上有佛者廬飛來自龍眠神人
所施設是物無頑堅想當刳闢初風雨驅神鞭鑿開渾沌
竅巧貯聰明泉僧房若蜂房一一皆倒懸爾來幾閱世不
計草木年磐石具生機長根外包纏波濤潤其趾日月行
其顛散爲松柏香聚作桺檀煙蔽虧東西景軒豁子午天

呼猿在半空日暮躋無緣清寒難久住仍放出峽船

雙石

南中英石硯山多出工匠補綴而成惟產自沙土中天然無刻畫痕者斯爲上品余歸笈得二枚焉一爲佟中丞所贈峯勢迴環中穿六孔一爲姚番禺所贈勢若飛雲孔大小倍之以尺度之長皆三寸許世所稱緻瘦透者殆無美不備此游獲此亦足以豪矣今日行過德慶舟中無事羅列几案賞玩不足紀之以詩

韶州山石奇英州山石秀人言奇者雄不若秀者瘦蒼龍骨離立歲久色微黝脫落之而鱗深埋無底寶結成巖洞勢潤被沙水漱玲瓏具本性蹙縮聚眾皴斧鑿絕纖痕中虛互通透偶然遇好事不恪高價購置之几硯旁命曰小雲岫一拳殊不易況敢望多又而我獨何幸歸舟誇日富熊魚兩得兼彼美適邂逅款款儼欲飛翩翩若相就人間陸賈裝金玉難單究千金眞俗物至寶肯輕售何如落吾

手出入在懷袖再拜謝故人茲情亦良厚

平蠻歌爲靈川令樓敬思作

槃瓠遺種成野豸充拓百粵西南間桂林所屬半猺獞猺

性稍馴獞性頑獞中廖三乃最狡結砦背子

義甯縣山名藏神

姦義甯邑宰畏如虎長惡不復加防閑康熙五十有六載
遂逞螫毒爲民患公然越境大劫殺乘勢搖動西江灣靈
川樓侯奮髯怒一念軫卹周痾瘝請于中丞願勦賊朝發
夕下無留艱官軍壓境屹不動旁睨翻笑書生孱豈知仁
者必有勇勇氣遠過齊成驪力捐百鎰鑄戎器更募丁壯
踰千鰲仲冬誓師謁神廟聲並淚下垂潛潛與神幽明共
守土捍禦災患宜相關狼貪豕突忍坐視一任滿耳嘵孤
鰥陣圖兵法貯腹笥臨事布置神安閒先營壁隄後煬精

下極坑谷高躋攀天寒雪少但瘴霧地盡石出皆榛菅孤
軍深阻三百里間道別取千尋山賊巢漸近徑彌惡出賊
不料攻而環焚林燎穴何處遁照耀巖壑朱旗殷渠魁就
殲脅從赦散以畎畝閭閻闢自從出疆追飲至三十五日
師旋般明朝獻馘上幕府隊仗整肅排班班受成例應給
大賚爲國惜費情非慳有酒盈缸其色碧有羊在牽其首
盼侯不居功以歸眾單醪挾纊胥均頒人傳封事上北闕
我適問道將西還過侯治下暫弭楫爲我掃榻開門櫬杯
闌抵几聽陳說竊歎膽氣何其殊如聞鼓鼙作餘力如覩
介冑當躬擐朝廷設官鎮羣獠文武分職毋相奸至令儒
臣建偉績壯士毋乃多頽顏是庸作歌勒諸石義在小雅
誰能刪他年采入桂海志碑額不愧書平蠻

查克建字求雯號用民海甯人康熙丁丑進士歷官鳳

翔知府

詩話用民初白子辛東鹿有惠政人爲部郎民爲立
生祠遇生日爭走京師致祝初白生日亦然初白有
詩紀之

芍藥

嬌紅粉翠趁風流十里珠簾盡上鉤回首東風舊時路鬢
絲人老說揚州

寄靈隱法座諦輝

冷泉亭上多年別夢裏清涼一徑通方丈簾垂花影外法
堂人散雨聲中千山夜靜香林月萬壑涼生竹閣風敲罷
木魚僧退院長廊惟見佛燈紅

王式丹字方若號樓村寶應人康熙癸未一甲一名進

士授修撰有樓村集

詩話樓村爲諸生卽有盛名宋牧仲列其詩於江左十五子中以會狀登第鄉舉時本擬元後改第六三元嘉話僅一間也詩派在唐宋之間查初白最稱之體格蓋相近云

送湯逸林入都卽致湯西厓編修劉後齋都諫

今年早熱月在午千里出門不知苦聞君欲別飲君酒酒

酣問君向何許往者汗漫游長安一峯草堂北道主謂侍

公白門太史深相知旅舍乃能致脩脯逸林前館於胡璞崖先生名人

畸士紛京華出入馬蹏覓儔伍百尺梧桐閣正開萬丈長

虹氣能吐時蛟門先生深相接遇微名得失何足論相知所貴寫肝

腑人生合散風中煙迸淚晨星詎堪數歸來至竟不稱意

卜畫蕭條守環堵逸林所居名卜畫堂叢卉春垂三徑雲老松秋亞

一枝雨收身聊樂茗香清顧影卻慚鹿豕聚乍提襍被辭

妻孥復走長安作羈旅十年往事難重陳欲歸何門行踽
踖故人惟有湯與劉青瑣紅蘭鸞鳳侶南州榻下好淹留
公孫閣裏方延佇計君到時夏正深雪藕銀桃勝甘乳易
酒一斛浣頭塵提攜如意蹋筵舞余方墨守餘幽憂寂寂
徒令笑鄧禹爲致兩公相問訊離緒萬端憑告語

惜別謠

雨霏霏風微微感春客子攜春歸
蕙紅飛盡結楊柳杜鵑
嘯瘦腰幾圍蘭橈划動清歌起
楚尾吳頭一千里誰其遺
之金錯刀手把瓊英照江水

燕壘謠

前溪啄晴沙晴沙裏落花別院掠微風微風接飛蟲呢喃
只傍觚稜東側翅珠簾第幾重
離離野鳥湖之涘朝鳴暮

宿菰蘆裏不須苦羨雕梁壘自引雙雛拍春水

奉詔增修皇輿表院中卽事次韻顧書宣前輩

瀛洲亭畔靜階除
匱匣槐枝亞碧虛
池面輕風迎散帙
檐牙初日照繡書
共知定本推前輩
未敢傳鈔付小胥
東觀從容參典校
駒駖載筆愧庸疎

棲塵簾閣喜新除
祕冊駢羅几席虛
周室職方傳舊志
漢家年表效橫書
要從鞬韉增圖籍
豈爲華離問史胥
理罷縹籤方永晝
垂鞭歸拂晚風疎

錢名世字亮工武進人康熙癸未一甲三名進士授編

修厯官侍講有古香亭詩集

詩話亮工未第時游萬季野之門助修明史季野覆
審史藁其當刪改增補者每日考訂訖夜則跌坐口
授亮工筆述之及季野卒於京邸遺書多爲所得後
因附年雙峯獲遺集無傳僅見江左十五子詩選

中

題延陵季子廟碑後

逃位曾傳泰伯風
那言高義子臧同
江山未改仍公子
人物無憑只上中
地僻似村煙月白
廟閒如社野花紅
傷心窟室鉞交後
斷送亡王泣甬東

觀潮

早潮濺濺明星沒
晚潮浩浩初月出
潮去潮來自古今
秋毫不見江波溢
渡江著屐升顛崖
江流端正白道斜
吞海亭前放兩眼
溍然耳畔喧雷車
汀鳧渚雁知潮信
拍翅驚飛排水陣
半江崩浪大千山
突過中流肯平進
白馬麤毛十萬匹
怒蹶蹴踏寒風颺
如茶素甲鼓聲高
睽陽霜刀橫擊律
雪龍天矯空中飛
飛魚怪物相追隨
鱗爪變現領珠

落毒涎霧噴光淋漓鬪霆擊電海門碎巨壑蕩潏藏舟移
汨沒沙洲不勝計但憑遠峯露螺髻雲根直欲信流去虹
洞蒼茫極風勢江豚掀簸豈自由天吳叫嘯水仙愁弄潮
吳兒好身手驀波燕躍伸黃頭敬岸水痕添一丈漁舟箇
箇浮天上絕港空陂盡灌輸枯荷敗蘖皆神王濤偃端平
鏡面圓千溪小艇乘江漲君不見錢塘羅刹淩浙西歲歲
嚙壤江邊隄英雄豪氣奪天險犀弩立射潮頭低此地憑
闌卻回首青門文采今何有閒看七發廣陵潮急買六朝
京口酒

贈宋射陵

冬青蕭索遺民少海濱寬閒存一老
睽睽晨星氣象高華峯削翠金天杳
百年以來人事變射陵先生眼所見銅駝

荆棘蒼鷺飛露掌仙人辭漢殿南都斫盡靈和柳二月不
知春句綫後庭花唱商女口琵琶筆築成高宴臺城應教
秋衾客掃跡荒村守迤賤叢殘蠹帙過五車石田茅屋蒼
苔居長編一卷必在手百家諸子時收漁野蔬新翦濁醪
熟檐花墜雨寒窗虛兩京舊事飽其腹閒談湧出泉百斛
蘭臺掌故多放失江天少微有實錄薦書急奏楊鐵崖白
衣宣至參史局見聞覩縷談靡靡八表十志成必速不然
土室作詩史空想蕉園在鹽瀆君不見永甯寺側藏書樓
寶光夜夜騰斗牛鹿門偕隱夫何求長君健筆思廉儔難
椽官館來日事那羨區區史通子

聞雁

前除置酒談竟日秋色滿眼何清佳一聲初雁忽相感霜

信直逼長安街羈孤客子正無賴百事卒卒煎情懷三春
刷羽到秋半棲息未定行藏乖萬重雲裏接哀響此境倍
覺歸吾儕金風紫塞浩呼洵雪花早被千山崖雨城池邊
冷透骨挈羣南徙依江淮寒河蘆葉頓銜盡橫絕蒼靄如
檣排毛衣皎潔性高介叫空嘹唳非淫哇慈恩塔級眾翔
集亦或颺去天之涯山頭落翮不成字猶賸半折黃金釵
雖謀稻粱有氣骨肯向沮洳尋蝦蟇江南八月煙水闊迴
汀枉渚流嘈嘈雕胡接呷易充腹勿慕爽塏嫌卑窪朔方
健兒好彈汝肉登鼎俎翎盛歟冥飛尙恐矰繳及斜戛莫
與鷹鷂偕生平飲啄乃定分何地獨少雲霄階衡陽奇峯
暫卻轉永嘉有宕堪藏埋來賓終假上林宿鶯行鳳侶鳴
和諧撫絃目送碧天遠窗外素月窺蕭齋

蔣廷錫字揚孫號西谷一號南沙常熟人康熙癸未進士改庶吉士授編修官至文華殿大學士諡文肅有

青桐閣詩集

詩話文肅初以舉人在京供奉內廷詔與汪灝何焯同賜進士一體殿試膺館選遂由詞垣海掌鈞衡與張文和同稱碩輔宋牧仲采其詩與王方若式丹吳山掄廷楨宮友鹿鴻厯徐大臨昂發錢亮功名世張日容大受管青村榆吳荆山士玉願俠君嗣立李百藥必恆繆湘芷沉王麟照圖炳徐學人承宣郭于宮元鈺同列為江左十五子詩選尤工寫生稱逸品

題小顛墨竹

畫竹不如真竹真枝葉易似難得神風晴雨露皆有意子瞻與可無其人去歲闢地栽新竹枝葉離披覆茅屋竹梢枯勁竿清瘦久久可以醫吾俗昨夜雨過月上時壁上掩映青青枝張子對之無一語淋漓潑墨發異思淡煙輕霧

筆底生枝枝盡帶風雨聲移向乾明寺中挂壁石好撰張顥名

送陶子師任昌化

匡州圖畫便悽然況復窮荒在日邊道險不知山水趣法寬猶用宋元錢高廉瓊三處皆用古錢丁卯歲制督吳公請行錢法而古錢盡廢然瓊州海外至今未格也月明黃木灣頭驛人語紅蕉花畔船只有一端廉吏計木棉花發省裝綿

甲戌除夕

閒過流光實可憐半生狼籍舊山川霸橋風雨留殘跡瓜步雲煙憶渡船庾信聲名枯樹賦賈生經濟治安篇此情已作今宵夢細數更籌待隔年

家園消夏

荒畦種蠶豆小圃栽蘿蒿長豆莢大摘採甯辭勞驅愁
似避瘧尋樂如追逃緬懷一畝宮猶是先人膏一時功名
意於我吹鴻毛清晨石上立爽氣西山高

會意不在遠偶吟興自適松花綴黃玉香氣發蒸栗落粉
如飯煮不向道人乞靜觀草木趣閒得魚鳥逸看月有隙
地彈琴有壤室世事比獅子解弄得六出來日苦尙多得
失那可必

草長塞三徑芟拔爲鋤荒獨留蜀葵花紅白遙相望綠蘿
深窈窕高松倚青蒼雖無向日心而得枝葉昌庭前堆亂
石橫卧如羣羊還疑身入羣對石兩相忘

得邵甘來中州信感賦

昔年郊野逐行旌馬上風煙今古情枯木遠當人面立白

雲低向屋頭生召陵地僻初無縣博浪沙橫舊有城零落
雄圖同悵望驛亭爲我覓題名

和子逸夜坐韻

蘋末風生白葛輕小庭景物又秋聲相看酒戶隨年減
有詩懷入夜清荷葉翻時珠露瀉豆花香處亂蛩鳴
莫謂無多地一片寬閒江海情

涿州

遠樹微茫綴碧空范陽驛畔塔鈴風驚回驢背江南夢恍
似金山落照中

徐潮字青來號浩軒錢塘人康熙癸丑進士改庶吉士
授編修官至吏部尙書諡文敬

瀛臺賜魚和趙少宰韻

冰覆霜鱗色瑾瑜承恩齊向苑中趨臨流欲躍干髻集繞
樹爭攜萬木呼波飮蓬池名最美影連緋袋寵先殊還須
共識和羹意免得庖人越俎虞

趙殿最字奏功號鐵巖仁和人康熙癸未進士官至工
部尙書

從子誠夫以詩見贈次韻答謝

閒居瀟灑樂春溫菜圃茶亭認近村歲月且貪花裏過兒
童不厭市中喧看書反復難求解問字推敲未掩門取次
將成終老計草堂已掃舊巢痕

涂天相字變庵號存齋一號迂叟孝感人康熙癸未進
士官至工部尙書有靜用堂偶編續編

詩話變庵以壬午癸未連捷成進士年四十矣出同
邑熊文端之門講學篤守師說與張清恪陳恪勤相

應和其言詩以朱子爲古今詩人之冠
嘗取感興詩擬之張清洛爲序其集

雜感詩

兀坐空堂中萬籟俱寂寞嗒然喪我形天地同寥廓微飈
鳴窗罅入耳神已覺東西揣方隅高下胡起落此心遂不
靜紛然萬念作歛起立窗前飄風捲積籜觸目感時序忽
忽轉不樂可知物交物牽引如繹絡苟無大常存動靜都
無著咄哉隱几翁槁灰焉可託

盎水置庭中雖寒猶未冰微風吹一過便如霜霰凝更復
動搖之磊砢結層層已而冰到腹覆之不可傾沖沖鑿以
斧勢將羸其瓶坐待陽和至一泓仍自澄始事知有由後
患庶可徵

暑夜待風忽至

赤烏竟日逞炎威四壁如爐晚不移遠際雲生山乍動高
空風起樹先知方憑曲几襟初豁旋拂匡牀枕欲敲叫譎
一聲涼入骨快哉何必問雄雌

陳邦彥字世南號匏廬海甯人康熙癸未進士改庶吉
士授編修官至禮部侍郎有墨廬小稿

詩話世南工書虛和秀逸出入松雪香光兩家倣書
南齋爲景陵所賞鐫珉題榜往往出其手以是書
名重一時

書楊大東厓賞花詞後

粉白脂紅鬪豔香冶游還逐少年場輕盈態度依楊柳細
膩風光上海棠好鳥有情當客語狂蜂無賴爲誰忙江南
才子多閒思收拾繁華錦一囊

吳廷楨字山掄號南村長洲人康熙癸未進士厯官諭

德有古劍書屋詩鈔

詩話南村早有才名宋漫堂采其詩入十五子選中鄉舉後因籍貫奎誤南巡獻詩復之召直南薰殿尋登第入翰林遭際頗異詩有幾社餘風骨韻兼勝不僅以藻麗見長

觀潮

閶闔長風吹海立馮夷怒挾天吳入層層駕浪薄秋旻涼
波如沸魚龍泣海門匹練遙飛來龕山赭山青崔嵬罔象
橫衝雨畦束巨靈直擎中流開劃然分奔吼餘怒霆擊雷
轟碎天鼓日車傾戾義和愁疾掩陽烏避吞吐倏忽奔騰
萬馬猶鳴夷蹴踏來窈冥雪山摧翻鼇脊瘦冰柱迸裂蛟
涎腥俄聞春岸喧雲碓旋見跳波散珠珮驚濤蕩潏天低
昂亂石砰訇山破碎潮頭一落百尺強迎潮之子凌蒼茫
千桅乍隱鷗起沒一葉忽浮鳧拍張目精眩轉毛灑淅我

生江鄉惜未識吁嗟向若卹然驚倒瀉長江盪胸臆水犀
强弩干雕翎欲尋斷鏃揚遺靈釣臺西峙灘漲急海天頽
洞孤煙青

淮陰釣臺

惆悵王孫去不歸功成無復理蓑衣漢家只有桐江叟長
保秋風舊釣磯

天妃聞

斷堰鎖崔嵬奔流下石隈勢吞淮甸盡聲撼海門開水氣
晴吹雨天風夕送雷扣舷驚絕險誰是濟川才

次韻酬汪宮贊

少賤儒冠誤長貧旅缺存艱難逃魏厠寥落立齊門國士
矜殊遇王孫感故恩十年湖海客重把寸心論

秀野堂公讌韓慕廬先生扈蹕還朝

鳳池激灩水波平畫繡爭看傍輦行南濟舟航隨夏后東
巡筆札領春卿移蓮里第歸鞍晚飛蓋家山賜醴清裁詔
餘閒方退食絳帷弟子挾書迎

曉望華嶽

曙爽西來嶽勢尊削成天外射初曦寒松翠滴仙人掌晴
雪光浮玉女盆氣肅金晶橫地軸路尋箭筈倚雲根懸知
絕頂通呼吸直欲排空謁帝闈

雜感

奕碁世事太悠悠覆罷殘圖玉局收寬詔豈同逐客令高
貲自署富民侯金鞍照路羞逢掖珠履迎門笑蒯緱少孺
詆媒方朔讎空將詞賦學俳優

宋至字山言號方庵商邱人康熙癸未進士改庶吉士

授編修有緯蕭草堂詩

詩話山言爲西陂家宰長子少侍宦游與愚山堯峯竹垞諸老宿論詩於漁洋尤心折稱弟子漁洋亦謂詩家三昧山言獨以神會既入詞館主貴州鄉試往還得詩若干篇爲泮柯集與湯西庄使黔集並爲時所重又出視浙江學奉豕宰諱遂里居不復出卒年七十

送介維返歙縣

故人理歸櫟秋色老芙蓉此日一尊酒何時尺素書江楓
銜落照海雁下荒渠我亦羈棲客能無憶舊廬

秋晚同志上賦

飄蕭風雨滿江鄉無那羈愁分外強井上高梧零淺碧籬
邊叢菊破深黃半天寒色侵歸雁一笛秋聲怨夕陽何處
林泉堪寄傲幽尋好向贊公房

謂北蘭

送心壁上人還開先寺次青門韻

鄧尉探梅罷高僧別我歸煙江聊握手春雨細霑衣路逐
青山杳帆攜白鳥飛到應三月暮猶及看薔薇
兩度匡廬過開先未一游飛流喧客夢清磬隱僧樓樹密
時時兩山深日日秋送師今夜裏遙憶玉潭幽

端書

端書洗硯更焚香冷淡生涯興轉長二十四橋紅葉徧雁
聲和月過東牆

郊城夜行

鞭梢指點問前程狐帽狼裘踏雪行霜月欲沈風力勁斷
鴻聲裏過郊城

萬經字授一號九沙鄞縣人康熙癸未進士改庶吉士

授編修乾隆丙辰舉博學鴻詞

詩話授一爲充宗子少承家學治禮春秋二經視學貴州爲蜚語所中令通州修城斥家財竟役丙辰舉大科授一年七十爲最長袁隨園年二十一爲最少皆浙人也

弔周烈婦

天地有正氣綱常藉人扶當其志所激弱女勝丈夫四明濱巨海潢池肆樵芻象邑當厥衝殘賊甚剝膚婦也冰霜姿詩禮爲楷模倉卒走避賊從夫出闔閭弱質旣窘步況負六月雛夫婦不相保踉蹌各奔遁事勢在危迫死生決須臾舉身赴清流不復憐呱呱一死祇自全含笑歸冥途荒荒白日黯慘慘寒雲鋪數日具含殮顏色腴不枯健兒盡膜拜聞者咸歎吁於乎烈婦心豈爲聲名圖巾幗留正氣身死名不徂會當紀彤管國史他年書

閔衍號印麓應山人康熙癸未進士官戶部員外郎有
印麓山房詩集

朱子文畫雨中見訪

雁下湖光遠鴈淩霜氣高此時見之子物外挺人豪幽意
秋飛練長吟硯湧濤丈夫忘得失豈復戀綿袍

曹維城字价人貴陽人康熙癸未一甲一名武進士歷
官雲南副將

初秋登黔靈贈瞿脈上人

黔山精舍好相對有名僧道悟無生妙禪參最上乘茶煎
澗中水香靄佛前燈不許塵凡到雲嵐護幾層

胡期恆字元方號復齋武陵人康熙乙酉舉人官至甘
肅巡撫有蜀道集

詩話復齋迎蹕獻詩授翰林院典籍出爲夔州通判
適年雙峯撫四川深器之數歲累遷卽至開府雙峯
恃功而驕意氣凌厲復齋侃侃時有所規正及雙峯
事敗自陳由其薦擢就逮下獄乾隆初得釋寄居江
南久之乃卒復齋詩尙才氣
激昂跌蕩可想見其爲人

灩澦堆

大江西來四千里爭入一綫夔門天夔門偪仄不肯受回
波捲浪青雲巔白鹽赤甲互犄角日與水鬪尋戈鋌巴蜀
雪消春漲發何人敢放東吳船奇哉峽口灩澦石巍然獨
立江中間白帝逶迤作屏障瞿塘環繞如晶盤千溪萬壑
雷電激中流一柱來當前有時如象又如馬出沒變化難
言詮江流縱強亦退聽勢窮力竭翻求憐步依灩澦不敢
肆安流而下生洄瀾夔門巫峽二百里本爲險地今平川
乃知天意畏傾覆留此要令江無權共傳禹功費鏽鑿巨

靈神斧開煙巒至今百神遞呵護絕頂不敢停鷹鸕朝宗
萬派必經此好與嵩岳名俱傳

立春內江卽事

玉壘峯晴翠作堆金堂水暝碧波洞寒從昨夜三更減是日
丑時立春人與春風一日來紫陌未飄京兆柳紅妝爭插壽陽
梅酒鑪依樣臨邛好只少雍容車騎才

九日南樓留別

不爲悲秋感不禁朝來悵別倍蕭森望雲空下思親淚飲
水猶存報主心風雅憑誰傳爵里江山此日惜登臨伐檀
深愧詩人意賸有樓頭幾醉吟

劉青震字嘯雲號方書襄城人康熙乙酉舉人官內閣
中書有葵園詩草

蔣家渡晚眺

浮雲淡淡晚天晴
遠水孤帆混太清
落日漁樵喧渡口
隔隄煙火出柴荆
平原趺坐侵秋草
驢背吟詩入暮城
卻羨老僧無世事
禪關深鎖一鐘鳴

王企堂字紀遠號雪坡雄縣人康熙乙酉舉人官荆溪知縣有雪坡詩藁

水淀荷花

水淀浩無涯東西連混漾
平時水不風波面平於掌
夏日菡萏開尤令煩襟爽
吾生惜景光行樂及時往
載酒挈良朋中流蕩
輕桹翠蓋與紅衣一望渺
且廣人在鏡中游花從塵外賞
水清見游魚叢密難下網
一曲采蓮歌臨風散清響
玩久不知疲坐看纖月上

王霖字雨楓號弇山浙江山陰人康熙乙酉舉人官南

宮知縣有弇山詩鈔

詩話弇山詩法放翁篇章之富清適之致皆與相似
放翁生日紀事詩有云生及宣和無事日死猶垂涕
中興年足括放翁一生
晚歲有集杜集陸諸編

歸田詩爲後翁作

杜鵑催歸我不聽布穀催耕君不辭朝來忽聽布穀語爲
君演作歸田詩歸田路出青門道高柳半天青若掃杏花
開落菖葉齊江北江南插秧早君家舊業剡溪邊十年作
宦殊可憐栖栖食祿難稱意收身還種南山田南山蕪穢
理初畢半種香秔半種秫烹葵煮筍餉東臯朝看村童驅
犢出暮看田叟荷鋤還暮暮朝朝十畝間課雨量晴聚鄰
里黃雞白酒開心顏不稼不穡風所刺吾獨何爲久淹滯

篝車自笑願空奢
珠桂人言居不易
君今歸田弗復疑
千載沮溺遙相期
我亦行尋耦耕侶
逝將與國充耘耔
布穀布穀弗爾欺
杜鵑會有催歸時

山中夜宿

雨歇林光黑
山深夜色淒
哀猿穿徑過
怪鳥瞰鐙鳴
貧女寒機急
愁吟獨客低
老衰眠較少
復此感羈棲

楊花

纔看飛雪楊花似
又見楊花似雪飛
總與白頭相映發
可憐老眼只依稀
亂隨行跡鋪苔徑
故傍吟身透薄幃
念汝無情尙漂泊
天涯羈宦幾時歸

望金山

乾坤放眼昔登臨
坐閱東流赴海深
千古江山風月我

年身世去來今波濤卷盡英雄恨檣艣摧殘老病心輸與
住庵元長老妙高臺上聽潮音

南海子

野水環流禁苑前繚垣百丈走平田風毛雨血呼鷹地雪
暗雲黃殺虎天盛世詞章誇羽獵健兒身手數幽燕雄文
誰道相如似不獻長楊又幾年

全軌字車同邳縣人康熙乙酉舉人有眞意堂詩集

正月晦日作

人有三寸舌出口成字句春秋在齒牙褒貶無少顧客觀
松下碁指揮劫殺誤樂哉局外人就局苦難訴

相知在知心知心良獨難旦奭猶不保何必慕金蘭操琴
向廣陌未奏淚先彈伐國問仁人邪佞固其端

月山集卷之三
憶昔兩渡河半載八千里嬌女病在懷棄之於垂死呼我不絕聲恍惚猶在耳行路爲酸鼻而我何堪此死別無戚顏今羨食肉鄙君子重絕物豈不察心裏

我生始一歲祖母躬鞠之手自調飲食卧起無暫離纖悉到衣履拮据念載奇諸孫亦已多我獨育如兒八旬奄在邇危疾勢莫支驚聞馳一騎暮踏荒山陁欲一視晨昏揚鞭指燕達三至市有虎流言周公疑白雲不可見南望徒漣漣

燕山鬱岵巖易水流浩浩念我同根人于役在遠道揮淚望故鄉髮白一何早生無歸來日死葬邊城草豈不怨離訣天命難自保朝露矧易晞悲哉陳情表

潔身如處女遠嫌避瓜田倚伏有不測況乃百其愆隕霜

遂殺草一墜千仞淵白日何杲杲浮雲去高天寄語悲歌者勿爲萋菲篇

青士明府招同吳天章游閩鄉南山九龍泉入夜始

歸署賦詩紀事

雨氣昏三日晴光籠萬井鳥入石林深人行溪路永陟岡
泥尙滑渡水浪猶猛千折到荆山十里望秦嶺野闊想姬
牛原高問軒鼎塵沙埋古塞風雷祕靈境僧戶啟層臺龍
泉瞰絕頂天圍遠近村田亂南東町黃雞進野服白墮攜
方領寒嚼召平瓜大食了翁餅焉知禮法疏那復冠裾整
手勢恣喧呼腳力競馳騁君子喜啾啾小人絕悻悻海鷗
自可下國狗誰云獷不知落日低乍覺單衣冷蕭蕭聽騶
駱聒聒隨鼉鼉翳翳烏裊陰淡淡蒼蘆影人煙漸罕罕鬼

火忽耿耿紅燭導斜橋青衣指深窾近城路始平出險轡
還並佳客信江湖使君詎酩酊乏嘲夾谷欠餘羨延陵勇
一石酒量豪萬斛詩才湧探珠君早獲倚玉余眞幸他年
共把讀聊作黃金鑛

得新城王阮亭書

太室拱四嶽洪河落九天山川久不神蕭條六十年赤兔
奔嘯月紫鸞翔禮山屹如瞻二華可望不可攀豪氣帶湖
海微言參閩關同工而異曲枿鑿誰方圓漁洋老尙書今
之歐陽韓淵雲皆後起咳唾分媼妍喟然稱二子何李崛
後先聯鑣復對宇此事古所難一顧遇伯樂駑馬心亦安
勿嫌屈指客雅欲別蕭蘭如何千慮失厠我二子間左提
與右挈鼎足峙中原汝墳兩舍邇哲匠愧比肩吹竽濫南

郭貽笑固其端

寄劉太乙

汲黯歎積薪頗恨後來上豈知初盛間文伯常交讓功成
自一時禮樂賢草創陳杜兩拾遺代起無衰旺彭城奮襄
野才大年方壯下筆走雷霆豁如泯江漲古今入鑪錘臨
文空所傍風雲萬態殊誰顧襄州樣大兒愧文舉稟脫或
西餉三舍避從前兩雄吾敢抗四海王新城金魚心所向
虎卧誰敢違熙然推大將歸來益讀書局戶塞其向踪跡
慕黃公淵源窮素王足明俊哲情遠到疇能量記我會無
人埋名聽崖嶂

青士明府自塞外歸奉寄時丙子十二月

凍硯炙空山蟲魚老自註昂昂七尺軀埋頭死章句聖武

邁周宣猷猗哀匪茹四海望旄鉞邊塵靜一怒公實轉河
粟慷慨出中路鱗鱗十萬車兒撫軍法御貔貅壯宿飽敏
捷回天顧從軍盡如此何至臨機誤公才信兼人幕府無
留務盾鼻磨醉墨橫槊詩還賦十載滯洛西幾類終身錮
茲焉豁心眼蛙井嘲窮措別離歎一年歌嘯悲獨寤馳想
伊吾北奇游未免妒胸藏十萬甲故紙終難據歸來捫蝨
談定似河東注

卽事呈青士明府

龍頭熊耳佳山水竹樹村村如畫裏府君無事日鳴琴坐
見閒雲生女几退食時抽架上書香爐茶碗對潛夫偶然
陪客芳郊去半醉沿溪看打魚

洛陽感興

一編常閉戶畏踏洛陽塵獨鶴霜驚夜羣雞雪亂晨飛騰
應自失哀怨竟誰陳去去驪駒在梅溪已放春

洛陽

幾度崎嶇過石林鬢邊愁見二毛侵駝街白日千門冷馬
市紅塵十丈深山禿閣猶臨闕塞岸崩河欲到城陰誰能
喚起蘇秦嫂問爾何須叔有金

秋興

一年強半已天涯入眼南鴻影欲斜青桂雨遲初著蕊紫
薇秋晚尙開花病夫煩厭通侯菜久客難分小婦茶道是
薄寒人又中模糊無夢不還家

妙香齋題壁

半載奔馳聊復止此間幽事頗相宜縱橫野竹低交戶高

下寒花亂壓籬
痛飲誰憐邀月放悲歌
自哂問天癡燕山
易水茫茫路回首
中原淚每垂

歸思

歸帆幾日挂雙蒲
夜夜寒螿惱病夫
太守欲過應仲遠
故人殊愧阮元瑜
悲來天地思塵甑
老去河山惜鍛鑪
惟有百年零雨恨
驚魂預恐怯江湖

早發安陽橋

風吹殘月遠天西
細草平鋪望欲迷
萬柳壓城城不見
長煙漠漠亂烏颺

上學憲京江張先生

浮雲三十六年空
罔極王通涕淚中
猶憶低眉親說與
一生快事又空同

翟一枝字蟾一涇縣人康熙乙酉舉人

桃花潭打魚歌

涇灘南下九里曲紅雨錦鱗映波綠老漁家住山之南作
慘養魚如養蠶終年持竿不離手截江而取心尤貪西岸
鳴榔應東岸大罟雲合人聲亂挺叉紛從煙波入濺沫飛
濤走驚電細鬣巨鱗不知數登盤更愛雪花粲樓頭少婦
取作羹手執雙鯉不忍烹放爾徑渡桃花水尺素憑寄千
萬里卻羨生涯易足似漁家夫舉網婦擎槎年年不負潭
上花

南天章字漢雯昆明人康熙乙酉武舉官至湖廣提督
自黃茅嶺至大哨作

崎嶇不減夜郎西春雨春風送馬蹏寂寞山岡花爛漫子

規時雜鷓鴣嘯

浦銑字柳愚嘉善人康熙乙酉拔貢有百一集

詩話柳愚撰賦話三十卷附庸六義遠溯淵源同縣金方雪觀察成珪爲其高第弟子書成寄使刻行並附以詩詩末以歸安吳景旭歷代詩話自擬謂其博采羣言而以己意疏證之頗非苟作者蓋亦自道其苦也

代柬寄方雪

到及羊城秉蘭時龍門捧袂愜心期不爲王粲登樓賦但和陶潛止酒詩筆墨有緣聊自適陰晴無定報君知只餘一事應輸我四月輕紅壁荔支

晚晴簃詩匯卷五十六終